



O Volapükafilens Valöpo!

Sagoy, das net nämik dabinon stabü famül. Net alik binädon sästantiko me famüls, kels binons bumablögs veütik ota. Famüls nämik mekons nämikis netis.

In famül lärnöy lärnodis veütikün lifa. Utan, kel kömon de famül gudik, binon buädi gretik nete, bi sevom ad kobolifön püdo ko kemens oka e ad fruto keblünön skilis oka ad dünön sogädi in valem.

I lärnöy vödis balid püka netik in famül. Cils vifiko lärnons lomänapüki. Ab ömikna pals cilas no labons netäti ot. In tef at, cils labons pöti ad lärnön, plä lomänapük, püki telid, kelosi dunons nen fikul gretik.

Is in Greta-Britän dabinon län vemo smalik nemü Velsän, kela pük lifon nog. To mäted Linglänapüka, igo pøjuts in pasetatims, pük Velsänik neai edeadon. E kikodo-li? Kodü famül, kel egaledon oni love tumyels. In Velsän cils mödik lärnons Velsänapüki balido, bi binon pük famüla. Sevoy gudiko, das cils vifiko olärnons Linglänapüki poso. Ye if no lärnons Velsänapüki in famül as pük balid, mögos, das neai olärnons oni.

I Sperantapük lofon sami frutik obes. „Denaskaj Esperantistoj” binons jenöfot lifa. Lärnöy lomänapüki ad kosädön ko flens, calasvists, otlanans valemö; ab me Sperantapük lärnöy ad kosädön ko ret menas da vol, danü famül.

Valikos blöfon veüti famüla in tef at. Famül gudik kanon noe dugälön sifani gudik, abi nunani volapüda medü pük bevünetik!

Valikosi Gudikün Oles ed Olikanes

*Ralph*

VOLAPÜK DABINON DÜ YELS BALTUMKILDEG

Tü yel 2010, mázul 31-id, yels 130 epasetikons, das Volapük pädatikon. Ya ün tumyels bük, isteifoy ad datuvön bosí, kel öbinon pötik ad pagebön as kosädamedöm valemik bevü nets distik. Steifs valik at ye emiplöpons. Pas el Johann Martin Schleyer eplöpom ad jafön püki mekavik, kel lölöfiko binon pötik pro disein at.

Volapük, do binon pük mekavik, dalabon patöfis valik, kelis i natapüks dalabons, sodas jenöfiko kanon pagebön äs pük votik alik. Zuo binod Volapüka binon so balugik ä so kleilik, das lärn gramatapüka at flagon timi ze vemo nemödikumi, ka ut natapüka alseimik. No kanoy kludo stunön, das ven äseivoy Volapüki, id äprimoy ad digidön oni, ed äbetikoy ad dasevön valemio oni asä kosädamedömi bevünetik ut, keli äneodoy so draniko. Ab dasev valemik at no äjenon, efe sekü feits mifätik, kels idavedons in vüm Volapükavola it. Feits at edämükons tuvemiko Volapükamufi, bi äkodons bruli so gretiki, das öman ädeflekon oki de Volapük.

Läbo tim at epasetikon. Volapük perevidon staböfiko. Baläl penätükon dönu. Oflagos te nog töbidi mu vemiki ad vobädön, das Volapük labülön dönu pladi, keli vönädo seimna älabon, e keli nog ai digädön.

E nu Volapük dabinon dü yels baltumkildeg. Binobs danöfiks dö utos, kelosi ya ekanobs dagetön, ab binobs ön mafäd vemik no nog koteniks, ibä in tef at stadobs nog in fagot tu gretik de zeil pedesinöl.

Balido Volapük äbinon pük bevünetik soelik. Anu dabinons püks mödik votik. Zeil onas binon dientifik ko zeil obsik. Erivons-li stadi pedesiröl? Liedo no. E kikodo no-li? Dilo bi püks mekavik feitons nog bevü oks; dilo bi püks netik vilons labön rouli somik. Do Volapük äbinon pük balid somik ad jonön vegi, püks votik lesagons, das binons gudikums. Jünu püks netik egaenons feiti. Klüliko nets kanons gretükön fluni okas da vol dub atos. I dalabons moni mödikum ad segivön. Votaflano püks bevünetik propagidons cifo fa dünädans medü mon pemiedüköl. Ab keslopans pükas bevünetik vilons lesagön, das pük somik jenöfo dabinon e no vilons glömön dabini ota.

POEDOTS TEL FA HIEL PAUL VERLAINE

NEN TIÄD

Drenos in lad obik  
Äsä reinos su zif.  
Kis binon neviläl somik,  
Kel dränon nu ladi obik?  
O noid svidik reina  
E sui glun e sui nufs!  
Pro lad sufäläla  
O kanit reina!  
Nu drenos nenkodo  
In lad at, kel gagon.  
Ab kio! Trät nono  
Lügöd at nenkodo.  
Dol binon badikün  
No sevölo kikodo,  
Löf e het ga nen fün –  
Dol lada gretikün!

IN FANÄBÖP

Sil, sus nuf,  
So blövik, so stilik.  
Bim, sus nuf,  
Klädön pami okik.  
  
Klok, dis sil, keli logoy  
Toenon svidiko.  
Böd, su bim, keli logoy,  
Kaniton lügiko.  
  
O God obik! Ekö us lif,  
Balugik e stilik,  
E kömon nu se zif  
Noid püdöfik.  
  
Kisi edunol-li, o sagolös!  
Drenöl is vo lunüpao;  
Kisi edunol-li, o sagolös!  
Is bliböl vo yunüpao?

(Prüdö! poyümot –li neai pakazeton)



RÄTIL

Ämutob kolkömön Laustralänani, Lamerikänani e Kanadänani in  
lutapof pro kompenät oba. Balan onas panemon Robert, keli äsevob  
sunädo. Neai ikolkömob onis büo. Lio äkanob-li seko sevön utani  
penemöl : Robert ?

Betikelös osi!

PÄST SÄRENAS

Visions äkleilikons. Hiel Jeremy ästopon ed ästeifülom ad säntretükön magodis, kels älundilons fo magäl oma. Nu äkanom nedotabiko logön fomi koapa vomik, kel äsveamon su vat. Herem blonik ofa ätenon in flum. Äbinon magod ot, keli ilogom dü dels ömik anu, spatölo, äs kösömiko, ve melajol in soaralulit. Balido, magod äbinon tu fibik ad distidön patis ota, ab del alik ilofon magodi japikum, äsif stöb foga änelogädikon. Ab adelo magod äbinon saidiko kleilik ad voiko logön oni.

Iplakom visionis somik büo, ed äsevom, das äbinons nuneds, kels änunons ome riskädís u jenotis mimalik. Ed atos binosöv bügolan jenota dredabik in fütür sunokömöl. Ba ya odelo-li, ud igo udelo-li?

Älüodükom tikis dönu äl magod; ästeifülom ad logön patis mödikum. Äbinos-li ba vom penoyöl, kel suno öpupon su melajol? E koap ofa älogodon äs koap stifik, e no nenlifik. Si! Äbinos fūmo fom vomik. Tikamagot äflapon omi. Ba magod särena neodik, kel piviodof seimo in mel, e kel anu äsvimof ko nämet lölik oka, spelölo ad pasavön. Atos ökleilükos logis maifik, kels älebegons yufi, äsi stadi koapa, kel töbo ämufon, ab kel ilabon nog lifi. Si! Ekö tuvedot vala.

Ünü spad delas ömik, sären neodik pöjedon sui melajol, ed öbinom blümik ad atos. Sötom fümön, das öbinom us tü timül kuratik et pö top kuratik ad lofön yufi mögikün ofe. Ba ösötom igo nunedön poldanefi, nunön jenoti okömöl. Votaflano tikamagot at no äbinon gudik. Neai büo äkredoy omi, ni poldans, ni votans. Gudiko äsevom, das valemö äcedoy, das äbinom vo man bældik lienetik, kel lödom soelo, e kel vitom kontagi valik ko „vol jenöfik.“ Nendoto visions oma pömoükons dönu ko tovül jotas as cütids tikäla petomöl. „Gololös lomio, o Jeremy!“ ösagons. „Steifülös ad balädikön ko lejenöf. Lüvolös domi suvikumo, reidolös delagasedi, juitolös televidi. Siol e soelöf dämükons oli. E steifülös, begö! ad no drinön somödo. Kälolös oli büä perol lölöfiko datiki.“ Ipölom anikna, bepenölo ones visionis oka, ab no öpölom dönu.

#### IV:29:2010

Noe no äkredoy omi, ab äfümom, das id äkofoy omi kläno. No ävilom gevön ones pöti nulik ad besmilön omi. Ed äklienom ai plu ad siolön oki de „vol jenöfik,” ad moikön de mens, ad vitön delagasedis e televidi, äsi nesiämi valik somik. Äsludom ad bejäfön oko säkädi at.

Ästudom magodi särena in ditret nog balna büä äfainikon. Poso äspatom dönu, logölo stääni mela ä lefogis, kels äbeijutedons ta sil ai dagikum; ädalilom luvokädis raudik mövas. Odelo ba öbinon del. Öblümom. El Jeremy äfövom vegi oka.

Dred äfäkükon eli Jeremy. Edelo ilogom visioni finik voma, kel äsveamof su vefs; herem lunik ofa ätenon in vat, logs ofa älebegons keliedi. Ab atna id älogom, ko bluv gretik, das päzüof fa böds, kels jiniko ästebedons timüli gudikün ad tatakön ofi. Kisi äkanon-li sinifön? No äbinons vulturs in mel, kels ästebedons jüs dead viktima. Ab böds äjinons mimaliks; ömiks onas id ikömons nilü sären, bi äfaemons ba, u kodü lebadöf.

Tikamagot utosa, keli latikumo ötuvom su melajol ädremükos omi. Büikumo ka kösömiko äspidom lü melajol ed ägolom lü top, kiöp äsenom, das jenot dredabik ösävilupon.

Äbinos süpäd gretik ome, das melajol äbinon fulü mens; tü düp at, melajol äbinon kösömiko vagik, pläämü spatan ömik. Ästepom vifikumo ed äküpedom, das pluamanum menas us äbinons cils, kels äronons valöpo e kels ävokädons laodiko, dranöfiko. Kis äjenos-li? E cils, lio idatuvons-li, das bos öjenon pö top at, tü timül at? E kisi ösinifos-li särene keliedik?

Äföfiogolom jüs irivom topi, kiöp cils valik äzirönons. Balidane, keli äkolkömom, äsäkom:

„Kis jenos-li? Kisi dunols-li is?”

Pul äsuilogedom, ed ägespikom: „Sumolös utosi, keli neodol. Binos ga glatik. Logolös!” Äkipom löpo dökis plastätik tel, äsmililom ed ämorönon.

#### IV:30:2010

El Jeremy no äkanom suemön, ed äfövom vegi. Älogom pulis mödik ko döks plastätik, ed äsäkom oki sinifi ota. Ästopom süpo, bi älogom pupi, kel äseaton su sab, herem e klotem äbinons leluimiks, logs maifik älogetof sili. Ek ilüvon-li pupi is? Äzilogedom ed ekö pups sümik mödikums; ömiks äsveamons nog in vat, votiks äseatons su jol. Zänedabäldotan smililölo änilikom lü om. „Soari gudik!“ äsagom. „Son u daut olik, binons-li id is?“

El Jeremy älemufükon kapi. „No labob cilis. Sagolös obe, begö! kis jenos is?“

„No sevol-li dö mijenot? Dö nafs tel, kels ekobojokons? Naf bal äperon dili fleda. Ninädians vemo pedämüköl äsadons, ed äperons dili ninäda. Pledadins. Pato pups e döks plastätik. Mödot gretik sveimons sui jol anu. Puls vifons isio; dabinons lemödoti pledadinas tuvoviki. Puls mödikün sukons dökis plastätik, bi pups pedämükons kodü vat. Te logolös joli. Binos äs päst!“ Man äsmilom, äsagom „adyö!“ ed älaigolom.

El Jeremy äzilogedom. Vero äbinons pups valöpo, mödadilo penedemöls fa diviyagans, kels sio äbuükons dökis, kels ilovelifädons tävi love mel nepedämükölis. Vefs äpolons sui jol pupis e dökis mödikums; fludot verik pledadinas. Ekö pup bal ti len futs oma; logs pupa äjinons logetön ini logs omik.

„Ekö vision oba“, ätikom. „Koap vomik, stifik, leluimik; logs maifik, ni menik, ni fun. Ye gudiko inäprätom visioni okik. No ätefos säreni in ditret. Fled pupas pä sveimon jolio. E böds, kels äzüons säreni, jiniko ad tatakön ofi, äbinons jenöfo döks plastätik, kels ikömons de naf ot. Äbinos gudikos, das no inunom visioni okik poldanefe. Äsludom ad gegolön lomio. Äkanom dunön nosi is. Fumo no äneodoy yufi oma. Cils, kels ävokädons mödo ed äzirönons, änenämükons omi levemo. Logs lemaifik onas äjinons kofön omi.

Su lomioveg ätikom: „Ba sötoböv logedön televidi fino. Ba oyufon obi ad kleilükön visionis oba. Ab ebo anu äneodom drini lalkoholerik ad glömön pülatimo seräni.

POYÜMOTS NEKÖSÖMIK (3)

Lio geboy-li poyümoti –**UG**? In gramats Volapüka poyümot at pubon in lised poyümotas, ab geb ota no gudiko pakleilükon. Lofoy samis bal u tel, kel no saidon ad lölöfiko kleilükön gebi patik läükota. Ekö kikodo vilob dibikumo bejäfön poyümoti at, kel binon säkäd pro mödikans.

Poyümot –**UG** kazeton kaladi binälik vöda, len kel paläükon, samo:

1. **REIDUG** sinifon kaladi reida; utan, kel plidon bukis binon reidugik (e reid utana obinon nendoto vidikum);
2. **KLOTUG** sinifon kaladi klotama; utan, kel löfon klotis binon klotugik (e binon ai deköfik).
3. **SPÄLUG** sinifon kaladi späla: igo pösod liegik, kel heton nespäli, binon spälugik;
4. **VOBUG** sinifon kaladi binälik voba; utan, kel binon vobugik plidon vobi mödo ed ovobon, samo, pro flen nenpelo;
5. **LEKANUG** sinifon kaladi lekana(s). Pösod lekanugik visiton suvo dajonädis e yalis, e labon löfi gretik lekanas.
6. **NOLUG** sinifon kaladi binälik nola; pösod nolugik binon mu veütik;
7. **PLÜTUG** - Liedo pösods plütugik no binons tu mödiks adelo, ab pösod vero plütugik binon ai utan, kel no kodon bluvi in sogod.
8. **PLAKUG** sinifon pösodis, kels elifädons dibikumo plakis mödik;
9. **SÜDUG** sinifon utani, kel löfon (e plägon) südöfi;
11. **BALUG** binon vöd balugikün, bi alan gudiko sevon nümi : bal, igo cils smalik!

Reidugan, (e rets), no binon pösod, kel reidon äs pluamanum menas, ab kel lecedon kaladi binälik ota.

VENTŪRS ELA „VUK” (3)



Gok kravon



Renar smalik  
lilon vokādi

Ncāi būo  
elilob vōgi at



Oblinob oie ba  
goki somik, ab  
goks nenvōgons  
vea renar snapon oui.  
Nu no galūkolūd obī  
dōnu !



Ei Vuk  
slipon jū soar.  
Galikōlo  
ledesirōm motīli  
e gemis. Bīnom  
levemo nelābik



Fino id ei  
Karak galikom

Momof  
-obsūs glifi!



Bliboms stanōn su  
lūbel e jōādōms  
nudi inī vien

Klo  
kōmon-ī?



Ekō lekat, kel elūvon  
vilagi oka, e lūkon  
mugafamōli



Ei Vuk joikon  
kapi plūdū, ab  
levifiko dōnu nīnio